

Date – 29/08/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Home Minister Pu K. Sapdanga’n kum 2024-2025 inkarah ILP 2,78,087 (Nuai Hnih Singsarih Sangriat Sawmriat Pasarih) pek chhuah a ni a ti.
- 2. PWD Minister Pu Vanlalhlana’n kawngpui siamna atana petrol leh diesel cess lak atangin kum 2025- 2026 inkarah Finance Department atangin PWD-in sum hmuh a neilo a ti.
- 3. Supply Minister Pu B. Lalchhanzova’n Oil depot nei turin Sorkarin theihtawp a chhuah ati a, Indian Oil Corporation Limited (IOCL) nen indawrna kalpui mek zel a ni a ti.
- 4. Nepal tuilian avanga thi zat chu 547 an tling tawh.

<><><>

HOME MINISTER : ILP

Home Minister Pu K. Sapdanga’n kum 2024-2025 inkarah ILP 2,78,087 (Nuai Hnih Singsarih Sangriat Sawmriat Pasarih) pek chhuah a ni a ti.

Assembly fur thutkhawm zawh taka ziaka zawhna a chhanna ah Pu K. Sapdanga chuan Kum 2024-2025 inkarah ILP pek chhuah atanga sum hmuh zat chu cheng Rs. 11,78,42,160/- (Vaibelchhe Sawm Pakhat Nuai Sawmsarih Pariat Singli Sanghnih Za Sawmruk) ani a ti a, Sairang Rel Station hawn September 2025 atanga July 2026 chhungin ILP 2,15,946 (Nuai Hnih Singkhat Sangnga Zakua Sawmli Paruk) pek chhuah a ni a ti bawk.

Minister chuan ILP pek chhuah atanga sum hmuh zawng zawng chu cheng Rs.8,80,67,100/- (Vaibelchhe Riat Nuai Sawmriat Sing ruk Sang Sarih Za) ani a ti bawk.

Pu K. Sapdanga chuan Dan ang thlapa ILP neia hnathawk hnam dang Mizoramah mi 13730 (Singkhat Sangthum Zasarih Sawmthum) an awm a ti a, ILP tawp hnu thlenga awm chhunzawm man chhuah an nih chuan Eastern Bengal Frontier Regulation (EBFR) Act, 1873 hmangin station-ah case siam sak thin niin hemi hnu hian District Court-ah thawnin Court hian pawisa chawi tir emaw thawn

let turin an chungthu rel thin ani a ti a, Kum 2026 chhungin ILP nei lo leh ILP fel lova lut mi 934 (Zakua Sawmthum leh Pali) man chhuah an ni a ti bawk.

(Desk)

<><><>

PWD MINISTER : NATIONAL HIGHWAY

PWD Minister Pu Vanlalhlana’n National Highway kawngpuiin Aspirational District zawng zawng a pawh kim tawh a ti.

Assembly fur thutkhawm zawh taka ziaka zawhna a chhanna ah Pu Vanlalhlana chuan MPWD hnuaia kawng thar siam a awm lo tiin National National Highway kawngpuiin Aspirational District zawng zawng a pawh kim tawh a ti bawk.

Minister chuan Mizoram pumpui ah MPWD enkawl kawng km 6614.81 a awm a ti a, Sorkarin kum 2024-25 ah seal coating leh re-surfacing km 464.55 leh kum 2025-26 ah km 534.27 a ti tawh tiin kum 2024-25 ah cheng nuai 6997 sen niin kum 2025-26 ah cheng nuai 6801 senral ani a ti bawk.

<><><>

PWD MINISTER : CESS

PWD Minister Pu Vanlalhlana’n kawngpui siamna atana petrol leh diesel cess lak atangin kum 2025- 2026 inkarah Finance Department atangin PWD-in sum hmuh a neilo a ti.

Assembly fur thutkhawm zawh taka ziaka zawhna a chhanna ah PWD Minister chuan Finance Department atangin PWD in kum 2025-2026 inkarah sum hmuh a neilo a ti a, District ah pawh hmalakna a awmlo a ti bawk.

Hetihlai hian Finance Department changtu Chief Minister Pu Lalduhoma’n sawrkarin Social Infrastructure & Services Cess leh Road Maintenance Cess lak a nih atanga kumin July thlenga sum hmuh tawh zat chu cheng vbch ₹1,68,31,20,534 a ni a ti a, Petrol leh Diesel atanga Cess hi litre 1 zelah Social Infrastructure and Services Cess atan ₹2 leh Road Maintenance Cess atan ₹2 lak ani tiin tuialhthei chhiah chu kum 2024 September ni 3 atanga lak ani a ti bawk.

Chief Minister chuan tuialhthei chhiah chu kawngpui siam nan kum 2025 – 2026 inkarah cheng nuai 1500 pekchhuah ani a ti a, kum 2026 atanga kum 2027 inkarah cheng nuai ₹4325 pekchhuah niin kawngsiam na atan cheng nuai ₹5825 pekchhuah tawh a ni ati bawk.

<><><>

HORTICULTURE MINISTER

Horticulture Minister Pu C. Lalsawivunga’n Champhai District huamchhunga Sapthei tam zawk chin zel a nih theih nan Horticulture Department chuan nasa takin hmalakna a kalpui mek a ti.

Assembly thutkhawma ziaka zawhna a chhanna ah Pu C. Lalsawivunga chuan tun dinhmunah Champhai District-a Khuangleng, Khawbung, Vaphai, Bungtlang, Zote, Mualkawiah Horticulture Department chuan Sapthei tam zawk chin zel a nih theih nan hmalakna a kalpui mek a ti a, Unit khat chu mi pakhat chan zel niin unit khatah hian Planting materials 1000 Nos zel pek a ni ati a, Champhai District huamchhungah kum 2026 planting season chhungin mi 223 hnenah pek a ni a ti bawk.

Minister chuan Horticulture Cluster ni turin khua emaw District emaw thlan sa bik an awm lo a ti a, a ram leh thlai chin tur bakah a hmun hma leh inkalpawhna awm dan a zirin eng khua pawh cluster-ah thlan theih ani a ti a, Tun dinhmunah Cluster 165 (za sawmruk panga) enfiah ani tawh a ti bawk.

<><><>

SUPPLY MINISTER : OIL DEPOT

Supply Minister Pu B. Lalchhanzova’n Oil depot nei turin Sorkarin theihtawp a chhuah ati a, Indian Oil Corporation Limited (IOCL) nen indawrna kalpui mek zel a ni a ti.

Assembly fur thutkhawm zawh taka ziaka zawhna a chhanna ah Pu B. Lalchhanzova chuan Oil Depot siamna tur hmun hrang hrangah zawn kual a ni tawh tih sawiin a hautak avangin IOCL lamin thuthlukna an la siam theilo a ti a, Mizoramah oil & natural gas exploration beih chhunzawm tumna a awm tih sawiin Meidum ramah natural gas hlawk tham lakchhuah tur a awm leh awm loh enfiah mek a ni a ti bawk.

Minister chuan Meidum leh Hortoki inkar Chhimluang lui a lei dawh chu zawhfel tawh ani tiin leiverh thuai anih theih nan sawrkar laipuah dilna thehluh mek ani a ti bawk.

<><><>

EXCISE MINISTER : DRUGS SEIZURE

Excise Minister Pu Lalnghinglova Hmar chuan kum 2024 atanga ruihhlo man hlut zawng chu cheng vbch 203 nuai 65,84,400/- a ni a ti.

Assembly thutkhawm zawh taka zawhna ziaka a chhanna ah Pu Lalnghinglova Hmar chuan Mizoramah kum 2024 atanga ruihhlo man zat chu a vaiin cheng vbch 203 nuai 65,84,400/- a ni a ti a, ruihhlo hi chi hrang hrang niin Myanmar ramri atangin leh thenawm state Assam, Manipur leh Tripura atanga man a ni a ti bawk.

Excise and Narcotics Department thuchhuah tarlan danin kumin chhungin rakzu litre 48,036 an man tawh a, zu bilh lai tin 1,07,596 bakah sap zu thahnem tak an man bawk a, Heroin kg 17 gram 280 leh Ganja 145 leh gram 499 bakah damdawi thahnem tak an man bawk a ni.

<><><>

NATIONAL SPORTS DAY

India infiammi ropui Major Dhyand Chand-a piancham puala hman thin Nation Sports Day chu Mizoram hmun hrang hrangah hman a ni a, infiammi ten tunlai mila hma an sawn theihna tura infuih tharna hun hman a ni.

Aizawl ah chuan Sports Minister Pu Lalnghinglova Hmar hovin Sports Authority of India Training Centre, Aizawl Mission Vengthlangah hun hman niin Minister chuan hun inher mil zela inzir thar zel tur leh theihtawp chhuah turin infiammite a fuih a. infiamna atana mamawh hrang hrang nei turin sawrkarin theihtawp a chhuah mek tih sawiin infiammi te chu mahni invawng chung a theihtawp chhuah turin a chah a ni.

National Sports Day hi District dangah pawh hman niin Lunglei ah chuan District Sports & Youth Office buatsaihin LDSC Ground No 2 ah hman niin tunhnaia National Teacher Award dawng tur a thlan Govt Electric veng H/S Head Mistress Pi Lalnunmawii chuan a hmanpui a, zirna leh infiamna kalkawp theih dan leh a pawimawhna hrang hrang sawiin hun hlimawm tak hman a ni.

Vairengte ah chuan zirna in hrang hrangah remchan danin naupang te chu infiamna chi hrang hrang neih pui bakah pledge saw rualin khawchhunga infiam mite nen hun an hmang a ni.

Mizoram University pawhin Dean’s Conference Hall, School of Earth Sciences & NRM ah hun hmangin zirlai hrang hrang an tel bawk.

National Sports Day pual hian nimin pia hkan District dangah pawh hun hman alo ni tawh a, Aizawl, Champhai leh Hnahthial bakah Saitual District ah zirlai naupangte hnena taksa insawizawi pawimawhzia inzirtir a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

TOURISM MINISTER : PM EKTA MALL

Tourism Minister Pu Lalnghinglova Hmar chuan PM Ekta Mall chu za zela 21.50% sak zawh ani tawh a ti a, inremna angin HLL Infra Tech Services (HITES) Ltd hnenah cheng vbch 45.92 pekchhuah tawh ani a ti.

Assembly thutkhawma ziaka zawhna a chhanna ah Pu Lalnghinglova Hmar chuan Sorkar-in Executing Agency atana a rawih, Ministry of Health & Family Welfare hnuaia HLL Infra Tech Services (HITES) Ltd hnenah Memorandum of Agreement (MoA) in a sawi angin cheng vbch 45.92 a pe chhuak tawh a ti a, an ni

hian Contractor hnenah an hnathawh mil in cheng vbch 4.92 an pe chhuak tawh a ti bawk.

Minister chuan PM Ekta Mall sak nana sanction zat chu cheng vbch 127.00 ani a ti a, hna chu kum 2025 July ni 18 ah tan niin kum 2 chhung sak zawh tura ruahman ani a ti a, a panna kawng chu Mizoram Public Works Department in an siam dawn a ti bawk.

<><><>

NEPAL

Nepal tuilian avanga thi zat chu 547 an tling tawh a. Mi 1545 chin hriatlohin an la bo. Chhanchhuah hna ngawrh taka thawh mek a ni a.He chhiatna thlengah hian India mi 290 chu chin hriatlohin an awm mek bawk a ni.

Hetihlai hian China chhimthlang lam Sichuan Province-a magnitude 5.1 a na lirngching chuan Nepal-ah tuilian a thlen leh thei nia sawilawk a ni a. Hmun him zawkah mi 800 chuang thiarchhuah tawh an ni.

(Newsonair)

<><><>

PM

Prime Minister Narendra Modia chuan vawiin hian ni hnih cham turin Uzbekistan a pan dawn a. Tun tum hi Uzbekistan a tlawh tum li na tur a ni. Prime Minister office thuchhuah danin ni hnih a cham chhungin Pu Modia hian Uzbekistan President Mirziyoyev nen ram pahnih inlaichinna chungchang an sawidun dawn a ni. India hi Uzbekistan-in sumdawnna lama a thawhpui langsar 10 zingah a tel a. Ram pahnih sumdawnna hlut zawng hi dollar tluklehdingawn khat a tling tawh a ni.

(Newsonair)

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 137-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>